

O Se Lagona Sili

Saunia e Jane McBride

E faavae i se tala moni

I na ua alu ae Paulo mai le vai, sa faia e ia ma Tama ni ofu mago. Ona faaee lea e Tama ma Tamamatua, ma le epikopo o latou lima i luga o lona ulu ma faamauina o ia. O lenei ua avea o ia o se tagata o Le Ekalesia a Iesu Keriso o le Au Paia o Aso e Gata Ai.

“Ua ou lagonaina lava le fiafia tele,” o le tala lea a Paulo. Sa ia pai atu i lona fatu. “Iinei.”

Sa fusi mau o ia e Tina. “E mafua mai ona sa e mauaina le mealofo o le Agaga Paia ina ua faamauina oe.”

Sa luelue le ulu o Paulo. Sa lei manao o ia e faia soo se mea e mafai ai ona alu ese lona lagona sili.

Ae o le aso lava na sosoo ai, na malepe ai i lona uso laititi o Carlo le vaalele meataalo a Paulo. Na sefeina e Paulo se tupe mo se masina atoa e faatau ai!

“Vaai i le mea ua e faia!” Na ee atu ai Paulo. “Aisea e le mafai ai ona e tuua au mea?”

“Ou te faamalie atu,” o le mumumumu lea a Carlo. Na tafe ifo loimata i ona alafau. “Atonu e mafai ona ta toe fauina.”

“O le a le toe tutusa lava!”

Na tamoe Carlo i fafo o le potu ma tagi.

Na maua e Paulo se lagona leaga i totonu. Sa ia iloa ina o le a le ee atu Iesu pe ita. Pe o le a ia toe mauaina ea lona lagona ina ua uma lona papatisoga?

“Sa ou folafola atu o le a ou taumafai e avea faapei o Iesu,” sa ia tau atu ia Tina, ma lona leo ua gatete.

“Ae ua uma ona ou sese.”

“Ua e faia se mea sese,” le fai atu lemu a Tina. “Ae o Iesu foi na tuuina mai ia i tatou se ala e toe maua le Agaga Paia faatasi ma i tatou pe a uma ona tatou faia se mea sese.”

Na iloa e Paulo le mea o le a ia fai mai. “Ua ou iloa. Salamo. Ou te talosaga atu mo se faamagaloga.”

Sa luelue le ulu o Tina. “Ona oo lea ina e ai i le faamanatuga, o le a faafouina le folafolaga na e faia

Ua sese Paulo. O le a se mea e mafai ona ia faia?



e mulimuli ia Iesu. Ma o le a e matuai mama lava e pei ona e i ai ina ua uma ona e papatiso ma faamauina.”

Na alu atu Paulo e sue Carlo. “Ou te faamalie atu sa ou ee atu ia te oe,” o lana tala lea. “Sei o ta toe fauina faatasi le vaalele.”

Sa ataata Carlo, ma na lagonaina e Paulo e pei sa ia faia le mea semanu e fai e Iesu. Ina ua ia faia lana tatalo i lona po, sa ia ole atu i le Tama Faalelagi e faamagalo mai o ia ma fesoasoani ia te ia ia sili atu ona agalelei ia Carlo. Sa i ai se filemu mafanafana i lona loto.

I lona aso Sa i le lotu, sa atili le gauai atu o Paulo i tatalo o le faamanatuga. Sa ia faalogologo ma le faaete-ete i upu. Ao ia tagofia le areto ma le vai, sa ia lagonaina le alofa o le Tama Faalelagi mo ia. Na sa’o lava Tina. Na toe maua mai lona lagona sili! ■

E alala le tusitala i Colorato, ISA.

- Afai e fou vaalele, o o latou apaapa e susulu ma iila. O le ea e feleleai i luga o apaapa e faatumauiina ai le vaalele i le ea.

- Pe a toa le aisa ma le kiona i luga o apaapa, o le a le mafai ona lelei le feleleai solo i le ea i luga o i latou. Ona le mafai ai lea e le vaalele ona lele ma le saogalemu.

- A o lei lele le vaalele, e faaoga e tagata faa-gaau lapopoa e faapasī ai apaapa ina ia latou toe susulu ma iila.

- Ona mafai ai lea ona lele le vaalele e pei lava o le taimi a o fou!

TAUSI I O OUTOU APAAPA IA IILA!

- Ina ua papatisoia i tatou, ua leai sa tatou agasala ma ua tuuina mai ia i tatou le mealofo o le Agaga Paia e fesoasoani ia i tatou e aoao ai ma tuputupu ae.

- Pe a tatou faia ni filifiliga sese, ua sili atu ona faigata ona lagonaina le Agaga Paia.

- Pe a tatou salamo ma tatalo mo se fesoasoani, e faamagalo e le Tama Faalelagi i tatou. Ua aveesea a tatou agasala. E mafai ona avea le Agaga Paia faatasi ma i tatou.

- Ona o le Togiola a le Faaola, e mafai ona tatou salamo ai i aso uma! I le aso Sa, o le faamanatuga e fesoasoani ia i tatou ia mama, ia manatua Iesu, ma maua ai se amataga fiafia, ma le fou.

TAUAGAVALE: ATA NA TUSIA E DILLEN MARSH